

Exitos grandi di "Magic Steps"

9 alumno mas ta bandona e scol di baile

Tres sala completamente yen Step by Step tabata tin den Cas di Cultura cu su presentacion anual cu 200 alumno participando den e show di baile "Magic Steps". E show a cuminsa cu presentacion die alumnonan mas chikito for di 3 aña di edad y 16 bailarina cu nan prome tutu y te finalmente e adultonan mas avanza cu tap, ballet, jazz, streetdance, flamenco y tango, haciendo e show aki un exito completo. E duracion tabata largo sinembargo tur hende a goza nan anochi di bailenan cu a sigui otro sin pauze entre e cambionan y tur hende a disfruta di e variedad den bailenan.

Esnan cu anualmente ta presencia e shownan di Step by Step por a ripara tambe e progreso cu e alumnonan a haci den transcurso di añanan. Pa hopi di nan tambe, despues di añanan largo bailando y sigui lesnan, yega un nivel halto cu tecnicanan domina den baile, ta bandona studio. Tin di nan cu e suerte di por sigui studia mas den exterior y otronan ta djis sali for di e ambiente di baile.

Diez aña pasa 9 alumno a bandona e studio, entre otro Merel Samboo, y Dyantha Maduro cu a bay sigui den ramo di baile siguiendo estudio di 4 aña y termina exitoso. Dyantha desde 2010 a duna les den bailenan moderno. Varios otro tambe a sigui baile den exterior y hasta ta trahando como instructora den exterior, y tin cu ta studiando ainda.

E aña aki 9 otro alumno a bandona studio pa bay sigui estudio den exterior. Nan ta Danique Lande cu a cuminsa den baile mas o menos 10



aña pasa den ballet y jazz y cu a bira un di e alumnonan mas sobresaliente di Step by Step. Despues el a sigui lesnan di bailenan moderno, tap y street dance y ultimo 3 aña e ta forma parti di Aruba Dance Formation y duna les riba diasabra na muchanan den ballet y tap.

Por menciona tambe Monique Bagheri cu for di su 4 aña di ea a cuminsa tuma les di baile na Step y Step y a desaroya su mesdenunbailarinatremendo, pero lamentablemente e no a sigui den ramo di baile awor cu e ta bay studia.

Adriana Henriquez tambe ta un bailarina cu a taha duro riba su tecnicanan y e ta bay studia na London.

Ta haya tambe Sue Ann Rasool un alumno di ultimo añanan cu ta bay Colombia, y Jessica Geerman cu tambe a cuminsa den baile cu 4 aña di edad na Step by Step y Irene Salamo. E dos ultimonan aki a taha duro riba tecnicanan y ta sigui cu baile como hobby. Esaki ta conta tambe pa Mireille Jacobs cu tambe a cuminsa den baile como mucha chikito y cu ta sigui



cu baile como hobby. Baile banda di un estudio pisa ta un combinacion fantastico door di pone tur stress un banda y disfruta di baile y musica y despues por sigui studia cu tur energia.

Otro cu e aña aki ta despedi ta Isabella Jurriens cu tame ta un di e bailarinanan cu a cuminsa cu Step by Step como mucha chikito. E tambe a desaroya den un bailarina tremendo y tambe lo sigui den baile como hobby banda di su estudio.

Finalmente no por keda sin menciona Orwin Gomes cu a inscribi den compania di su primo y su mama cu 4 aña di edad. E ta e unico cu ta bay studia baile como su profesion y a haci caba su audicion na Fonty's na Tilburg y Codarts na Rotterdam. E ta den contacto ainda cu otro scolnan ya cu e no a dicidi ainda unda precisamente e kier sigui. Kizas e por keda un aña mas cu Step by Step te ora cu e ta sigur di su decision.

El a duna les ultimo añanan den ballet, tap, streetdance y participa tambe den grupo Aruba Dance Formation. No por keda sin menciona esnan cu a duna contribucion grandi e aña aki na e show aki, UNOCA manera custumber ta contribui den tur esaki, SETAR y Faarup Law Offices y personal di Cas di Cultura, y naturalmente e publico cu ta yena sala y asina motiva e bailarina y bailarinnan den nan arte.

